

SESSION 1980

**AGRÉGATION**  
**CONCOURS EXTERNE**

**Section : LETTRES CLASSIQUES**

**VERSION LATINE**

**LA FÊTE DE MERCURE**

Clare nepos Atlantis, ades, quem montibus olim  
edidit Arcadiis Pleias una Iovi :

pacis et armorum superis imisque deorum 665

arbiter, alato qui pede carpis iter,

laete lyrae pulsu, nitida quoque laete palaestra,

quo didicit culte lingua docente loqui,

templa tibi posuere patres spectantia Circum

Idibus ; ex illo est haec tibi festa dies. 670

te, quicumque suas profitentur vendere merces,  
ture dato tribuas ut sibi lucra rogant.

est aqua Mercurii portae vicina Capenae ;

si iuvat expertis credere, numen habet.

huc venit incinctus tunica mercator et urna 675

purus suffita, quam ferat, haurit aquam.

uda fit hinc laurus, lauro sparguntur ab uda

omnia quae dominos sunt habitura novos.

spargit et ipse suos lauro rorante capillos,

et peragit solita fallere voce preces : 680

'ablue praeteriti periuria temporis', inquit

'ablue praeteritae perfida verba die.

sive ego te feci testem, falsove citavi

non audituri numina vana Iovis,

sive deum prudens alium divamve fefelli, 685

abstulerint celeres improba dicta Noti :

et pateant veniente die periuria nobis,

nec curent superi siqua locutus ero.

da modo lucra mihi, da facto gaudia lucro,

et fac ut emptori verba dedisse iuvel.' 690

talia Mercurius poscenti ridet ab alto,  
se memor Ortygias subripuisse boves.

20. D C

At mihi pande, precor, tanto meliora petenti,  
in Geminos ex quo tempore Phoebus eat.

'cum totidem de mense dies superesse videbis 695  
quot sunt Herculei facta laboris' ait.

OVIDE, *Fastes*, V, 663-696